

الحلم المريخي (بالعامية)

خبر عظيم ميه الميه
لكل الطهقانيين من الدنيا
اكتشفو في المريخ ميه !!
و هتبدأ هجرة فضائيه

إعلان هام لكل غلبان
لكل من في بلده اتهان
و أكلت لقمته الغيلان
لاقينا خلاص دنيا تانيه

دنيا هتبقى دنيا الغلابه
لكل المستضعفين فيكي يا غابه
اللي اتنهبو من الديابه
قبل الراحة الأبدية

دنيا فيها حاجه غير الكذب
حاجه كانو بيسموها حب
فيها لكل بني آدم قلب
فيها الضماير حيه

في المريخ مفيش دوشه وزحمه
لكل إنسان اتولد لازمه

هيشتغل هيدوق اللحمه

من غير قانون المحسويه

في المريخ مفيش طواير للعيش

مفيش إعلام شغال تدليس

و الشعب هناك مش محتاج حشيش

ولا غش جماعي و دروس خصوصيه

و لما يبقى معاك جنسية مريخيه

هتصدق كلام الأغاني الوطنيه

ولا تحلم تهج في أي داهيه

عشان تتخلص من العزوبيه

هتخضع لقانون درب التبانة

مش هتبقى من الأمم الجبانه

أخيرا هتدوق طعم الكرامه

لما تسبب الكره الأرضيه

خبر عظيم ميه الميه

اكتشفو في المريخ ميه !